

Wie du die hōle eines yedte
dings das krad auff gericht ist
durch seinen schatten
erfahren solt.

Das vierdt capitell.



O du eines thurns oder eins andern dings das
krad auff gericht ist/des höchsten vnd nidersten
teyl du sehn magst erfarn wilde di. rch seinen
schatten.

So hab vleyß das du der sonnen hōch durch das Astrola-
rium suchest so es bey tags ist/oder des mons so es bey nacht
were/vnd so dann die Regel auff die linia des mitteln schatten
das ist auf den diameter oder auff die kraden linia des qua-
dranten valle (Vnd als dann so ist die hōhe der sonnen oder
des mons 45 grad) so ist eben der schadt des thurns so lang
als der thurn hoch ist/daran darfstu nit zweiffeln.

So du aber gemelte hōhe nit krad heit ist zu der selben zeyt
so verzeüch ein wenig als lang byß du es gleich habest.

Es ist aber zu mercken das hye in vnserm Clima wēn die
sonn in den 6 mittäglichen zeichen/ist der schatten nīmer nit
dem ding das den schattē mache vergleicht wirt in der leng
wann der sonnen hōch ist nīmer nit 45 grad. Wenn aber die
sonn in den mitternächtlichen zeychenn ist/ von dem 9 grad
des wideres byß in den 21 der junckfraw/so zeigt vff das weni-
gest wenn die sonn scheint/der schat ein mal alle tag die hōhe
des dings das denselben schatten macht.

Wenn aber die hōhe der sonnen oder des mons 45 grad
übertrifft/so ist auch der thurn höher dann sein schat/Vnd
hat sich die hōhe eben in 5 proporc gegen sein schattē/gleich
wie sich der 12 punct in dem winckelmaß hatt gegen dem bez-
rütteten punct von der regel/damit man der sonnen od mons
hōhe genomen hat.